

■ CONVIVENZA

La Lia Rumantscha e sia communicaziun da crisa

DA SIMON DENOETH*

Questa primavaira n'avain nus betg mo gi da patir da l'aura miserabla. L'entir Grischun ha era stui supportar in sgarschaivel hic-hac e communicaziuns disgraziadas tranter exponents da la Svizra rumantscha. Sco il babnoss en baselgia han ins puspè ina giada sa dispità davart il senn e nunsenn dal rumantsch grischun. Alura hai anc dà in'attatga frontala vers il stil da manar da la Lia Rumantscha. Concretamain è vegnì renfatschà ad ella da betg defender posiziuns claras, ma era da sconuscher sia «raison d'être», numnadamain dad esser «in'organisaziun da lobi». La replica maladestra dal secretari general è suandada prontamain. Quella ha dentant irrità uschè fermamain ch'il secretari è sa perstgisà mo paucs dis pli tard.

Jau na sai betg co che Vos avais pertschavì quests fatgs. Objectivamain pon ins dir che la communicaziun da crisa tar la Lia Rumantscha haja anc potenzial da svilup. Sias posiziuns actualas puncto politica linguistica pon bain esser raschunaivlas ed orientadas vers l'avegnir. Ma la finamira da la Lia è era da «far ina politica activa a favur da la lingua e la cultura rumantscha». Pia spetgan blers ch'ella communitgeschia sias posiziuns ed insumma sia existenza cun pli gronda vehemenza e betg mo da maniera reactiva e defensiva. Uschia na fai betg smirvegliar ch'ina sbrinzla po chaschunar in fiu da strom en in batterdegl.

La profilaxa è adina la Lmeglra protecziun cun-



ter il fiu. En quest senn ha il schurnalist tudestg Udo Röbel cumpareglia la communicaziun da crisa cun in'acziun da pumpiers. Sco tar in incendi real datti trais facturs principals che determineschan sche la chasa brischa totalmain u sch'ella mitscha cun mirsnairs.

Primo: Quant svelt percurschais Vos la crisa, vul dir il fiu en chasa? Èn tut ils avisaders d'incendi intacts e dattan alarm ad uras? Lecziun: Pli svelt che Vos vesais il fiu, pli gronda è la schanza ch'el vegn stizza già a l'entschatta.

Secundo: Quant svelt clamaiss Vos ils pumpiers? A partir da cura avais Vos il curaschi da realisar che Vos n'avais betg pli sut controlla la situaziun e che Vos duesas clamar agid? Lecziun: Pli svelt che Vos renconuschais che Vos duvrais agid, pli baud pon ins gidar Vos.

Terzo: Quant professiunals ed effectivs èn ils pumpiers che Vos clamaiss? Permettais Vos als profis da far lur job u discurreis Vos adina tranteren? Lecziun: Dapli confidenza che Vos avais en ils pumpiers e meglie ch'els fan lur lavur.

Jau ma dumond sche la Lia Rumantscha ha installà avisaders d'incendi

per la communicaziun da crisa. Medemamain na sun jau betg segir sch'ella avess vuli acceptar agid per la communicaziun questa primavaira. En mintga cas speresch jau ch'ella haja il curaschi da vender e proclamar ses program e sia existenza pli dad aut en l'avegnir, perquai ch'ella po evitar da daventar ina marionetta da moviments e da critica mo cun anticipar e communitgar proactivamain. La fin finala vul ella esser la dirigenta dal concert rumantsch, u betg?

* Simon Denoeth lavura a Berna sco manager per la communicaziun d'impresa tar Asendia, ina joint venture internaziunala da la Posta Svizra. El ha ragischs engiadinais ed ha studegià politologia e relaziuns internaziunalas.

Vocabulari

patir	= leiden
sgarschaivel	= schrecklich
babnoss	= Vaterunser
senn e nunsenn	= Sinn und Unsinn
stil da manar	= Führungsstil
renfatschar	= vorwerfen
sconuscher	= verkennen
replica maladestra	= ungeschickte Retourkutsche
pertschaiver	= erleben, erfahren
raschunaivel	= vernünftig
sa smirvegliar	= erstaunen
sbrinzla	= Funke
fiu da strom	= Strohfeuer
batterdegl	= Nu, Augenblick
incendi	= Brand
mitschar	= davonkommen
percorscher	= bemerken
avisader d'incendi	= Feuermelder

Die Kolumne «Convivenza» erscheint in der Regel am Montag in der «Südostschweiz» und in der romanischen Tageszeitung «La Quotidiana». Unterstützt wird das Projekt von der romanischen Sprachorganisation Lia Rumantscha. Für Leserinnen und Leser, die nicht Romanisch verstehen, gibt es im Internet eine deutsche Übersetzung, und zwar unter www.suedostschweiz.ch/community/blogs/convivenza.